

**BN Pulau Pinang Bidas Kerajaan Negeri Putar Belit Kenyataan Perdana Menteri  
Bernama  
03 Julai, 2012**

GEORGE TOWN, 3 Julai (Bernama) -- Barisan Nasional (BN) Pulau Pinang pada Selasa membidas tindakan pemimpin kerajaan negeri yang memutar belit kenyataan Perdana Menteri Datuk Seri Najib Tun Razak mengenai cadangan pelabuhan bebas di negeri ini.

Ketua Penerangan BN negeri, Tan Cheng Liang berkata anggota exco kerajaan negeri yang juga anggota Parlimen Tanjong Chow Kon Yeow dalam kenyataan akhbarinya semalam, mengelirukan rakyat dengan menyembunyikan fakta sebenar kenyataan perdana menteri.

Chow dipetik sebagai berkata perdana menteri dalam jawapan bertulisnya di Parlimen mengatakan status Pulau Pinang sebagai pelabuhan bebas tidak lagi wujud selepas pulau itu dimasukkan ke dalam Kawasan Utama Kastam.

"Sebenarnya perdana menteri dalam kenyataan penuhnya berkata kerajaan pusat bersedia mempertimbang cadangan BN mewujudkan pelabuhan bebas bagi meningkatkan pertumbuhan ekonomi negeri dengan adanya sokongan daripada rakyat Pulau Pinang," katanya kepada pemberita di sini pada Selasa.

Tan menyifatkan tindakan pemimpin kerajaan negeri yang hanya menyiarkan jawapan yang memihak kepada mereka sebagai tidak bertanggungjawab dan tidak telus.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=677667>